

**Date – 25/10/2024**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

1. Chief Minister Pu Lalduhoma'n vawiin khan Union Home Minister Amit Shah hmu in hmasawna tur hrang hrang an sawi dun.
2. Sericulture Department hnuaiia Eri Project kalpul meka Sericulture Farmer te thar chhuah "Eri Cut Cocoon" chu State pawnah thawn chhuah a ni.
3. Vawiin khan Prime Minister Narendra Modia leh German Chancellor Olaf Scholz te kaihhruiin Intergovernmental Consultations (IGC) vawi 7-na New Delhi-ah neih a ni
4. Odisha leh West Bengal tuipui kamahte cyclone Dana tleh avangin ruah a la sur nasa hle.

<><><>

### **CM MET UNION HM**

Chief Minister Pu Lalduhoma'n vawiin khan Union Home Minister Amit Shah hmu in hmasawna tur hrang hrang an sawi dun.

Pu Lalduhoma leh Amit Shah inkawm hian P&E Minister leh Assam Rifles inkara thil thleng chungchang bakah ramria venhimna kenkawh dan tur hrang hrang an sawi dun tura rin a ni a, hei bakah hian state hmasawna tura hmachhawp hrang hrang te Pu Lalduhoma hian a thlen a ni.

Chief Minister Delhi zin hian Union Minister for Road Transport & Highways Pu Nitin Gadkari bakah Union Commerce & Industries Minister Piyush Goyal hmuin ramdang te nena insumdawn tawna leh hmarchhak bial in a chhawr tangkai tur hmasawna hrang hrang an sawi dun a, Mizoram National Highway hmasawna tur an sawi bawk a ni.

Chief Minister Delhi zin hi naktukah alo haw dawn a, alo thlen hnuah CM Conference Hall ah thuthar thehdarhtute a kawm nghal dawn a ni.

<><><>

### **SERICULTURE MINISTER**

Sericulture Department hnuaiia Eri Project kalpul meka Sericulture Farmer te thar chhuah "Eri Cut Cocoon" chu State pawnah thawn chhuah a ni a.

Sericulture Minister Pu Lalthansangan vawiin khan Aizawla Sericulture Directorate atangin a vailiam a ni.

Hemi pual hun hmanaah Minister chuan thusawiin, Cocoon te chu State pawnah man man zawka hralh theih a nih bakah, mamawhna a sang a, tawih chhe ve mai thei lo anih avangin thawnchhuah kawngah harsatna a awm lo tih sawiin kuthnathawktuten intih hmuh a, uar deuh a pawimawh tih a sawi.

Sericulture Department Director Pu V. Zothansanga chuan Cocoon khawitute pangngang khawite chu man man zawka an hralh chhuah theih nan sorkarin theihtawpin hma a la mek a ti a, Sericulture Department pawhin hlawk zawka Cocoon hralh anih theih nan hma an lak mek thu a sawi bawk.

Tun tuma Eri Cut Cocoon thawn chhuah hi Metric Tonne 2 niin Assam Barbeta Dist a Barpeta Marketing Jahur Uddin chuan a lei a, a leitu hi Silk Entrepreneur niin Kum 10 chuang NE a Cocoon thar te leikhawmin Assam leh West Bengal a Silk Spinner hrang hrangte a Supply chhawng veleh thin a ni. Kg 1 hi ₹700/- zela hralh a ni a, an lak chhuah tak a buhchium Metric Ton 9 pawh Mizoram chhungah ₹300-400 -in hralh vek a ni bawk.

Tun dinmunah Eri Cut Cocoon hi Department leh "Silk Cocoon Processing and Marketing Industry Private Limited" tang dunin state pawna an hralh leh theih nan, an thawkdun mek a ni.

<><><>

## **KOLASIB RAILWAY MEETING**

Bairabi leh Sairang inkar Rel kawng siam mek hmalakna chungchangah District Official te, Indian Railway hotute leh Rel kawngin a paltlang VC te vawiin khan an meeting a.

Kolasib DC Conference Hall Kolasib ah DC Pu Robert C. Lalhmangaiha kaihhruiin meeting hi neih a ni a, Rel kawng siamna atana mimal ram lak turah chinfel ngai la awm te chu chin fel a nih theih nan chak taka hma lak nise an ti. Hei bakah hian Relkawngin a paltlang tur atana ram lak chin pawn lam a hmalakna hrang hrang awm nia sawi chungchangah Hortoki, Mualkhang leh Khamrang area ah mi 13 in complain an thehluh chungchang sawiho niin, hei bakah hian Rel kawng contractor te hnathawhna avanga mimalin harsatna an tawh hrang hrang Rel kawngin a pal tlang khaw hrang hranga VC ten report pe in sawiho a ni bawk.

Rel kawngin a paltlang ram neituten zangnadawmna an la dawn kimloh chungchang te, Bairabi atanga Sairang inkara Rel in a hman tur electric ban phunna mimal ram compensate la dawng lo te leh railway company-in an la chhinchhiah loh hmun thenkhat a awm thu sawiho a ni a. Hun remchang hmasa berah District Collector te, Indian railway hotute, rel kawngin a paltlang VC te leh ram neitute nen joint verification nei tura ruahmanna siam a ni bawk.

He hunah hian Railway hotu te chuan kumthar March ni 25 ah Mualkhang thlenga Rel luh tir theih an in beisei tih sawiin, hei bakah hian Jamira, Hailakandi district, Assam a Relkawng chhia avanga Mizoram a Rel lo lut thei lo chu Relkawng siam that a nih tawh thu leh, bungraw phur Rel pawh a kal tawh thu sawiin, passenger Rel erawh a la kal hrih lo tih an sawi bawk.

<><><>

## **LS MP**

Lok Sabha MP Pu Richard Vanlalhmangaiha chuan tunkar chhung khan Mumbai a tlawh a. A cham chhung hian Mizoram House hmun thar tur Navi Mumbai ami a tlawh a.

Navi Mumbai-a hmun hi Mizoram House sakna tura ruahman tawh sa a ni a, a satu tur thlanfel vek hnuah kum tam tak sak theihlohin a awm a, sa tura Mizoram sorkarin inremna a lo neihpui tawh US Roofs Ltd. hotute hmuin, harsatna an neih te a sawipui a ni.

Lok Sabha MP hian Mizoram sorkar hmun petute City and Industrial Development Corporation of Maharashtra Limited (CIDCO) Vice-President leh Managing Director nihna chelh kawp Vijay Singhal pawh a office ah hmu in, Mizoram sorkarin harsatna an tawh te a thlen bawk.

MP hian Mizoram CM in lehkha ziaka Maharashtra CM hnena a thawn, he hmun chungchanga Mizoram sorkarin harsatna a lo tawh thin te a theih anga tanpui tura a dilna lehkha Maharashtra CM Office ah a pe a ni.

<><><>

## **NLM**

Ministry of Rural Development hnuai National Level Monitoring (NLM) te chuan vawiin khan Saitual DC conference Room-ah, District Bawrsap Dr. Lalngura Tlau kaihhruaiin 'Exit meeting' an nei a,

National Level Monitoring ah hian Pu Shailesh Kumar leh Pu Anil Sharma ten Saitual District chhung khaw hrang hrang- Phullen, Thanglailung, Luangpaw, Ngopa, Hliappui, Pawlrang, Buhban, Dilkhan, Lungpher leh Sihfa an tlawh a. Rural development hnuai scheme hrang hrang- MGNREGA, DAY-NRLM, NSAP, PMAY-G, DDU-GKY, SAGY, PMGSY, PMKSY, SVAMITVA, DILRMP, RSETI leh Panchayat basic verification te chu district-a kalpui a nih dante an endik a, report pawh kimchang tak leh langtlang taka an thehluh thu Pu Anil Sharma chuan a sawi a ni.

<><><>

## **PWD**

Tlawng Lei, Reiek kawng ami chu mipui hman theihin PWD Engineer-in-Chief Pu Lalrinkima Hnamte chuan bridge site, Reiek kaiah a hawng.

PWD E-in-C in a hawn tak Tlawng Lei hi metre 55 a thui niin metre 12.2 a zau a ni a. Lirtheiin a zawh tur chin hi metre 7.5 a zau a ni a, a sir ve ve ah hian ke a kalna tur metre 1.2 a zau siam niin Lei san zawng hi metre 7 a ni.

Tlawng Lei dawh nan hian Central Road Fund kaltlangin MoRTH in cheng nuai 757.56 a pe a, February 28, 2017 ah lei dawh hna thawh tan a ni a, thla 24 chhunga thawh zawh tura tih a nih lain June ni 12, 2017 ah ruah nasa taka a sur vangin Tlawng Lui kuang chim san ber anga chhinchhiah thin chu metre 5.05 in a chim pel a, hei vang hian Lei hi a tira ruahman aia tih san a nih loh chuan hun lo kal zel turah a him lo dawna hriat a ni a. Hetiang a nih vang hian lei dawh dan tur thlak leh vekin Lei dawh hna thawk tur hian M/S Satguru Engineers & Allied Services Pvt. Ltd. Guwahati thlan a ni a, ton 70 a rit dawl thei tura duan a ni a, PWD hotute chuan Lei hi a tlo zawk nan Lei chungah lirthei din phal a ni lo tih an sawi bawk a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

## **PM AND GERMAN CHANCELLOR**

Vawiin khan Prime Minsiter Narendra Modia leh German Chancellor Olaf Scholz te kaihhruiin Intergovernmental Consultations (IGC) vawi 7-na New Delhi-ah neih a ni. IGC hi ram pahnih sawrkara minister ten an hmatiam theuha thil pawimawh leh tha an sawihona leh an thawhhona thlirlet nan hman a ni a. He hunah hian Prime Minister Modia chuan thusawiin India leh Germany te thawhunna hrang hrangah kum hnih chhungin hmasawinna tha tak tak a awm a ti a. An thawhhunna langsar zingah ralthuam, technology, energy, hmasawinna thuantling leh khawvel ti chhe tlem zawk neih lamahte hma an sawn nasa a ni a ti.

Vawiini vek khan Asia Pacific Conference vawi 18-na an ho bawk a. Prime Minister Modia chuan thusawiin theihna, technology, ngaithuahna thar leh hmasawinna ruhrel te chu India thanna a ni a ti a. Kuminah hian India leh Germany inlaichinna chuan kum 25 a tling tih sawiin kum 25 lo awm leh turah chuan hei aia sang hi an thleng dawn a ni a ti bawk.

Prime Minister Narendra Modia chuan Germany in India mi thiambik nei hnathawkte tan kumkhata visa quoata chu sing 2 atangin sing 9 ah a tipung tih PM Modia chuan a puang bawk a ni.

German Chancellor Olaf Scholz pawhin thusawiin Germany leh India nena thawhdunna chu tihlen a ngai a ni a ti bawk.

Puan tawh angina German Chancellor Olaf Scholz chuan ni thum cham turin nizan khan India a lo thleng a ni.

<><><>

## **CYCLONE DANA**

Odisha leh West Bengal tuipui kamahte cyclone Dana tleh avangin ruah a la sur nasa hle a. Cyclone Dana chuan nizan zanlai khan Odisha tuipui kam Bhitarkanika National Park leh Dhamra Port a thleng a. Thingkung leh electric ban tam tak a tlu a, chenna in leh thlaichinna hmun engemawzat a ti chhe bawk a. Cyclone tleh avanga chhiatna thlengah hian thi leh hliam an awm thu dawn a la ni lo. Kan Corr report I lo ngaithla ang.

Bhubaneswar-a Met Office sawidanin cyclone in khawmual a thlen hian thli darkar khata km 120-a chakin a tleh a. Hei bakah hian Kendrapara leh Bhadrak district-ah te ruah a sur nasa a. Mayurbhanj, Cuttack, Jaipur, Balasor leh Jatgatsinghpur district ah te pawh ruah a sur nia thudawn a ni. Tualchhung thuneitute chuan cyclone tleh tur avang hian chhiatna thleng thei laka ruahmanna an siam a. Odisha Chief Minister Mohan Majhi chuan uluk takin a vil reng a. Cylcone in a tihchhiat bungrua, in leh lo te hi zirchian leh vek a ni ang.

<><><>

## **MANN KI BAAT**

Prime Minister Narendra Modi chuan naktip Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 115-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>